

Cuntegns teologics essenzials da la Federaziun da las baselgias evangelicas da la Svizra a “500 onns refurma”

Da quai sa tracti:

Sche nus festegiain 500 onns refurma, lura attestain nus ch'il messadi da la refurma è anc adina actual.

Ils refurmaturs han agì en il 16avel tschientaner, amez in temp en il qual persvasiuns e relaziuns da pussanza ferm francadas han cumenzà a ballucar. La visiun tradiziunala dal mund era vegnida scurlattada: Copernicus aveva chapì che la terra n'è betg il center da l'univers, ma ch'ella gira enturn il sulegl. Columbus aveva "scuvert" l'America. Gutenberg ha sviluppà la stampa da cudeschs ed ha cun quai chaschunà la libertad d'ina sveltezza da comunicaziun enfin ussa betg conuschenta. Al medem mument na pudevan far ils umans quasi nagut cunter la derasaziun da malsognas, la corrupziun e la regenza absolutistica da prinzis ed uvestgs, sco er envers la preschientscha dals Ottomans en il center da l'Europa. Bleras dunnas e blers umens bramavan d'avair dapli influenza sin lur ambient direct. La baselgia svegliava dentant las temas e mussava sia persvasiun che la vita terrestre saja be in pre-stadi dolurus da la mort e dal giuvenessendi.

Nus vulain ch'il messadi teologic dal giubileum da la refurma vegnia encletg – e ch'el delibereschia. Perquai tematisescha el las dumondas ed il quitads dals umans dad oz: l'individualissem globalisà che porta cun sai l'isolaziun; il pluralissem da las valurs che maina a relativissem ed indifferenza; il svelt midament dal mund che creescha in sentiment da malsegirezza, instabilitad e passivitat; las ideas apocalipticas davart l'avegnir da noss planet, la tema da l'avegnir tut persunala... Ma el duai er exprimer la fidanza che va ensemen cun mintga midament impurtant en la vita.

Quest text na mida betg ils problems. E la proclamaziun da l'evangeli na sto er betg vegnir fatga dependenta da situaziuns insupportablas. Ils refurmaturs han scuvert da nov il messadi central da l'evangeli. Er nus al schain, per nus ed oz.

Nus constatain:

1. Funtauna e success da nossa vita na giaschan betg en nus sezs u nossas stentas, ma ans essan dads en Jesus Cristus.
2. La dumonda da Dieu è indispensabla per mintga vita umana. Ella chatta sia resposta en Jesus Cristus.
3. Cun agid dal Spiert Sontg ans lascha la Bibla renconuscher Dieu e nossa clamada.
4. La fidanza grata e cuntenta en Dieu ans cloma d'ans engaschar en il mund er cun noss meds limitads.
5. La cretta en Dieu ans deliberescha. Questa libertad mettain nus en il servetsch da relaziuns persistentas e gistas en economia ed ambient, ed en dumondas socialas ed eticas.
6. Sco uffants da Dieu essan nus clamads da viver en pasch ense-men en e cun sia creaziun.
7. Nossa cretta persunala cloma suenter in barat en cuminanza. La baselgia è in lieu spezialmain bun per far visibel e per viver la vita regalada da Dieu.

December 2015